

Öise Lade 6-2011, p. 62

Jau ses sin in balcun vi d'ina maisa da dus. I va in bel ventin. Davosvart aud jau musica. Davant mai sin maisa stat in magiel bola rinfrestganta cun frajas dultschinas ed in lung plat cun si turettas da tomatas tschareschas, perlas da mozzarella ed ina bandiera da baselic, navettas da figs garnidas



La dumonda cardinala

cun chaschiel-chauroa frestg ed ulivas grecas emplenidas cun mandels. Gist daspera sa chatta ina cuppetta salata d'avocados preparada cun ieli d'ulivas e suc da limettas, cundida cun fleur de sel. Ed en l'aria ina savur odurusa da citronas e rosmarin.

Qua s'avischina tuttenina in galantum cun in surrir lusingiant. Jau al guard plain speranza, lasch crudar levet il givlar da mes vestgi e tschegn en sia direcziun. Jau fixesch ses lefs spetgond cun brama in invit per in saut. "Tge lain anc metter sin il gril?", ma dumonda el ed jau ma dasd andetgamain or da mes siemi. Mes ami tegna enta maun ina platta cun si lieungas da zuchetti, strivlas da peperoni, schampignuns emplenids cun gorgonzola, pitschens tartuffels e pistuns da tirc. Ils pèzs-pulaster trafilads cun paletscha da citronas e rosmarin brassan gia sin il gril. Vesend tut quests buns baccuns ma sent jau puspè pli datiers dal pajais da la cucagna. Ina grillada sin l'agen balcun è bain insatge flot - in pau sco vacanzas curtas. Sulettamain il timing stuain nus anc exercitar in zic.

Bels viadis en munds fantastics e culinarics e stai bainin!

A handwritten signature in black ink, which appears to be 'Angela Schmed'.

Angela Schmed

A second handwritten signature in black ink, which appears to be 'Schmed'.